

12.000 FIRMA CONTRA PLANNAN DI GOBIERNO PA HACI MAVONAN CATOLICO SCHOOLNAN PUBLICO



ORANJESTAD(AAN): -- Ayera tabata e dia cu Fundacion di Enseñanza Catolico Aruba (SKOA) y Fundacion Catechetico Arubano (CTA) a entrega e lista di firma di protesta contra plannan di gobierno pa converti cinco mavo catolico den schoolnan publico.

Den unicamente un siman di tempo, schoolnan catolico na Aruba a logra pa colecta no menos cu 12.000 firma!

Sin dudo alguno, esaki mester ta e cantidad di mas grandi di firma cu a yega di wordo colecta den un solo accion y ta obvio cu lo ta imposible pa gobierno ignora voz di Pueblo e biaha aki.

Ayeratardi, un procesion largisimo di varios cien hende a pasa den cayanan di Playa, cargando e lista di firma manera un reliquia.

E procesion tabata encabeza pa pader Rudy Lampe y zuster Juliette y tabata asina sereno cu el a pone hende corda riba e camindanan di cruz cu ta tene na Alto Vista riba Bierna Santo.

E hendenan tabata tin nan bukinan di misa den man y a reza y canta cancionnan religioso te cu nan a yega Bestuurscollege.

Ora nan tabata spera dilanti Bestuurscollege pa ministro di Enseñanza Mary Wever baha, mas cantica di misa a resona y tambe himno di Aruba.

Na prome momento a parece cu e ministro no tabata planea pa baha y cu e lo a laga pader Lampe y su rebaño para dilanti porta manera limosneronan.

Sin embargo, pader Lampe

tampoco tabata van plan di move di unda e tabata ta y a keda warda tranquilamente mientras cu su rebaño tabata los un cancion tras di otro y e funcionarionan di gobierno para dilanti Bestuurskantoor tabata murmura un remarke odioso y deningrante tras di otro.

Al final gobierno a dicidi tog pa duna e hendenan aki nan honor y e ministro a baha y na un manera jovial a tuma e 12.000 firmanan for di man di un di e manifestadornan.

Presidente di Parlamento y ex-ministro di Enseñanza Eddy Croes tambe a presenta y a haya e cantidad di firma.

Despues e ministro y miembronan di directiva di SKOA, pader Lampe y zuster Juliette a sinta den un reunion cu originalmente tabata planea pa 24 di November.

Durante e reunion aki, a discuti entre otro e carta cu ministro a manda SKOA tocante e asunto di pone e cinco mavonan bao di maneho di un directiva cristian y e contesta di SKOA riba esaki.

Segun ministro Wever, comunidad di Aruba y 12.000 firmante ta bao di e impresion incorrecto cu gobierno lo kier elimina schoolnan catolico.

Esaki no ta berdad y no ta existi ningun problema, asina señor Wever-Lacle a bisa.

Gobierno lo no elimina schoolnan preparatorio y basico mientras cu ta e diferente religionnan mes a yega na un acuerdo caminda a palabra pa traha den un solo directiva pa maneha schoolnan secundario.

Pa loke ta Paso Sigur por ehempel, ministro anterior di Enseñanza a bisa SKOA cu si e no coopera, gobierno lo crea otro school mescos cu Paso Sigur y e school di SKOA lo muri un morto natural.

E experiencia malo cu SKOA tin cu EPB a haci cu a dicidi cu ta tempo pa manda un señal cla na gobierno pa muestra cu no ta bay entrega nada mas.

Na e momento aki por ehempel, religion catolico no tin pia mas den EPB como cu e representantenan di SKOA (Mario Croes y Mirna Nicolaas) den directiva di EPB tabata tin asina poco di bisa cu nan a dicidi pa entrega nan retiro recientemente.

SKOA no kier pa esaki ta e futuro di e resto di enseñanza secundario tambe loke tabata motibo pa e accion ultimo.

E raport "Na caminda pa restructuracion di nos Enseñanza Secundario General" di e grupo di estudio cu a traha riba reorganizacion di schoolnan secundario SHA (Stuurgroep Herstructurer-ing AVO) lo ta basa riba e acuerdo aki.

E ministro ta bisa cu den caso cu SKOA kier cambia e palabracion pa cu e directiva cristian, e ta dispuesto pa papia.

E raport "Na caminda pa..." no a un decision final, aunke tin cu tene cuenta si cu gobierno ta bezig cu inovacion di enseñanza, segun ministro Wever.

Durante e conferencia di prensa cu directiva di SKOA a tene Diarazon ultimo, a bin dilanti cu e fundacion ta sintie menaza pa plannan di gobierno pa cu inovacion di enseñanza y cu SKOA ta kere cu tin hende den gobierno cu tin intencion pa elimina schoolnan catolico.

SKOA tin miedo di perde su cinco mavonan den e afan di restructurizacion di schoolnan secundario, mescos cu el a perde e schoolnan cu a bay bao EPB.

Den tempo corto, e cantidad di school catolico na Aruba a baha di 54 pa 48 (algun aña pasa a perde e huishoud-schoolnan Providencia, Immaculata y Mater Dei) y den caso cu e cinco mavonan tambe bira schoolnan publico, e cantidad aki lo a baha pa 43 school.

Gobierno no a hesita pa hunga tof den pasado pa forza SKOA pa laga su schoolnan bay.